



Protocol

dalla seduta dil cussegl da vischnaunca,
venderdis, il 24 d'ost 2018: allas 20.15 – 22.40
Liug: Casa communal

Presidi: Armin Manetsch

Actuar: Paul Duff

Presents:

- | | | |
|---------------------------|-----------------------------------------------------------------------------------------------------------------------------------|-------------------------------------------------------------------------------------------------------------------|
| a) Cussegl | Christoph Berger
Stefan Columberg
Edgar Durschei
Anna Maria Genelin
Wendelin Jacomet
Giusep Lozza
Livio Zanetti | Armin Berther
Adrian Deflorin
Mario Flepp
Rita Huonder-Tenner
Christian Loretz
Helga Probst-Linder |
| b) Suprastonza | Robert Cajacob
Victor Flepp
Iso Mazzetta | Clemens Berther
Jris Lombris |
| c) Perstgisas:
Cussegl | Admir Jasarevic | |
| d) Hosps | 6 | |

Plaid d'avertura entras il president

Visiuns daventan realitad

In ni l'auter da nus ei forsa sevilentaus questa stad, na buca pervia dalla decisiun dil davos cussegl, mo forsa era. Na, la canera dils helicopters ha duvrau las gnarvas d'enqualin. Mo quella canera ei in fetg bien segn ch'ei vegn investau fetg bia a Mustér. Mintga di han ins sgulau ils luvrers sil Cuolm da Vi e stediamein ei vegniu sgulau rauba el territori da skis. Lingias d'aua pils canuns da neiv ein vegnidas montadas e sil Cuolm da Vi ha ei dau in niev access cun provediment electric. Perfin sin territori da Tujetsch creschan las petgas per la cabina sil Cuolm da Vi ad in crescher.

Mo era a S. Catrina sepresenta l'emprema casa en siu vestgiu finiu. Il niev cuors dalla via ei bein vesibels era igl ual d'Acletta ha uss survegniu siu spazi meritau.

Mo tier tut quei sedamondan ins magari con ditg ch'ei detti aunc il sport d'unviern, sche nus vesein tgei schitgira e calira nus havein giu questa stad, fussen nus era prompts d'investar ton en cundrezs da bugnar praus sco en systems d'ennevar. Tgisà, forsa san ins gie funcziunar entuorn quei in di. Nus revedin oz la lescha d'agricultura. Vegn en quella lescha era risguardau nos purs tuttina sco tut nos investurs turistics?

Als purs vegn fatg bia renfatschas era pervia dalla canera, mo sch'ins mira tgi che ha tut astgau luvrar Nossadunna d'uost, lu ei quei stau tut auters ch'ils purs.

Senza nossa agricultura purtassen tut quellas investiziuns el turissem en nossa regiun pauc ni nuot, damai che nossa bellezza cuntrada vegness buca pli cultivada ed en paucs onns vivessen nus egl uaul. Era astgan ins buca emblidar che nossa maglia da mintgadi ei ina gronda part ord producziun dall'agricultura.

Mo ha era la calira da questa stad buca purtau ton donn che negin ha giu gudogn. Bia gliued dalla Bassa ha encuretg ils loghens pli frestgs ed ha aschia fatg stediamein vacanzas els cuolms. Aschia ha era nossa gastronomia saviu profitar giudlunder.

Suprastonza communal

Vus tuts haveis intervegniu cun che nies genau e vicepresidente communal Iso Mazzetta ha abdicau siu post da genau cun fin da quest onn. Jeu deploreschel ei zun fetg, denton capeschel tuttina era sia decisiun.

Nus perdin ina persuna cun ina immensa savida ed in genau che ha adina saviu presentar sias fatschentas en ina moda fetg simpatica e bein argumentada. Ei vala uss d'encurir ina persuna ch'ei dada per quei post.

In proverbi di «nus essan tuts remplazzabels», mo en quei cass ei quei lu tuttina buca aschi sempel.

Donnschtig-Jass

E sco davos less buca emblidar d'engraziar a tut tgi ch'ei segidau da presentar Mustér al "Donnschtig-Jass" ad Oberrieden ils 26 da fenadur 2018. Specialmein a nos giugadurs che han giu la curascha da star davon la camera. Mo era engraziari less per la bein gartegiada fiasta dils 2 d'uost 2018 cheu a Mustér.

Communicaziuns

Mortoris:

Gion Battista Hosang, naschius ils 16-10-1948, morts ils 11-06-2018

Rico Barandun, naschius ils 21-05-1947, morts ils 24-06-2018

Elisabeth Agosti-Maurer, naschida ils 11-09-1926, morta ils 05-07-2018

Naschientschas:

Elia Lutz, naschius ils 18-06-2018, feagl da Nadja e Rico Lutz

Jaron Schmed, naschius ils 03-08-2018, feagl da Daniela e Tomas Schmed

Arno Martirosyan Pfister, naschius ils 03-08-2018, feagl da Alina e Thomas Pfister

Tractandas:

1. Protocols 12- e 13-2017/2020
2. Lescha d'agricultura: Revisiun parziala (messadi nr. 23-2017/2020)
3. Center da sport e cultura: Sanaziun complessiva – Credit supplementar da planisaziun (messadi nr. 24-2017/2020)
 - a. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Armin Manetsch

Paul Duff



Cussegl da vischnaunca 2017/2020

Protocol no. 14

Seduta diils 24 d'ost 2018

1. Protocols

Protocol nr. 12-2017/2020

Il protocol ei vegnius purificaus e tarmess tier per posiziun. Enteifer ils tschun dis fixai ei vegniu inoltrau neginas objecziuns.

*Il protocol vegn **approbaus senza midadas**.*

Protocol nr. 13-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

*Il protocol vegn **approbaus senza midadas**.*

Cussegl da vischnaunca Disentis/Mustér
Il president: Igl actuar:

Armin Manetsch

Paul Duff



2. Lescha d'agricultura: Revisiun parziala (messadi nr. 23-2017/2020)

Presentaziun:

Suprastonza:

Gerau Clemens Berther:

El engrazia a cusseglier Wendelin Jacomet per empalar il presidi dalla cumissiun. Dapi 2013 retscheiva l'administraziun communal buca pli la survesta dils pagaments directs resp. dallas subvenziuns per l'alpegiaziun ed il gudiment dallas pastiras. Cheutras ei vegniu tschentau quen tenor ina valeta supponida e da lezza summa ei igl incasso da 10% succedius. Quei ei stau in dils arguments per reveder la lescha d'agricultura. Beinspert ei la cumissiun sedumandada co igl ei il pli prudent da tschentar quen. Tenor "Stoss" ni tenor ara. Tenor la cumissiun ei la calculaziun per ara pli semplia. La cumissiun ha definiu la tariffa sin frs. 1.--/ara. Plinavon han ins stuiu definir criteris pigl uorden da vischinar, cun quei ch'ils cunfins dils vischinadis ein semidai ils davos onns. Tier igl uaul eis ei medemamein stau da definir ils cunfins. Plinavon han ins priu sut la marella la tematica dils tgauns nua che la determinaziun ei in'existentia. Aschia eis ei beinspert semussau ch'il fatg dall'agricultura ei zun complex per definir detagls.

President dalla cumissiun Wendelin Jacomet:

La cumissiun ha salvau quater sedutas. Ils 27 da mars 2018 ha la cumissiun envidau signur Gujan Töni, cussegliader puril dil Plantahof alla seduta. Cumpetentamein ha el rispundiu allas damondas dalla cumissiun. La cumissiun ha era saviu seolver tier signur Pieder Vincenz digl uffeci d'agricultura e geoinformaziun a Cuera per ulteriur sclariment. Il regulativ per tschentar quen sto vegnir simplifiaus. Las cunvegnas existentas ston vegnir midadas en contracts. Ils 20 da matg 2018 ein la proposta per la nova lescha d'agricultura, il sboz dil contract d'affittaziun sco era la proposta pil regulativ da taxas vegni surdai dalla cumissiun per mauns dalla suprastonza communal. Igl ei impurtont che las cunvegnas existentas vegnan visadas a temps per saver semtgat ils contracts tenor il niev regulativ da taxas. Plinavon ei semussau che pliras leschas secruschan cun la lescha d'agricultura sco p.ex. la lescha davart ils dis da ruaus publics (840). La cumissiun ha inoltrau sias propostas per midadas dalla lescha davart ils dis da ruaus publics per mauns dalla suprastonza communal, cun quei ch'igl ei previu da realisar la lescha da polizia.

Cussegl, debatta d'entrada:

Cusseglier Edgar Durschei:

Il text dalla lescha proponida e las midadas ein buca levs d'interpretar e scaffeschan puspei novs problems. Cun ina discussiun generala duess il cussegl far attents sils problems e scaffir caussa clara. Vegn quei fatg aschia, drova ei ina secunda lecziun nua ch'ins sa decider en detagl. El fa la proposta da tractar la lescha d'agricultura en duas lecziuns.

Gerau Clemens Berther:

Igl ei denton impurtont da survegnir informaziuns exactas. Cun quellas sa la cumissiun far midadas. Silsunter va la caussa tier la suprastonza e vegn puspei avon il cussegl.

President dalla cumissiun Wendelin Jacomet:

El sa ir d'accord cun la proposta, fa denton attents che la lescha va en vigur cugl 1. da schaner 2019. Quei era sche la decisiun dil cussegl succeda suenter quei termin.

Decisiun:

Il cussegl decida senza cuntervuschs ed abstenziuns da tractar la lescha d'agricultura en duas lecziuns.

Discussiun:

Il tractament succeda artechel per artechel. Il president ni il gerau fa tier artechels ch'ei midai ina introducziun. Las midadas giavischadas vegnan pridadas encunter. La cumissiun pren buca posiziun sin mintga votum dil cussegl.

Cussegl:

Art. 1 validitad; ei vegn menziunau negina midada mo fatg la remarca ch'ins duei nezegiar la situaziun per simplificar prescripziuns ed encurir sligaziuns semplas ed applicablas.

President dalla cumissiun Wendelin Jacomet:

Art. 3; cun las midadas e las fusiuns dils vischinadis ha ei era dau midadas tier il vischinar. Nus havein en vischnaunca bia terren agricol e plitost pouca pastira. Tuts pagataglia dalla vischnaunca han il dretg da pastira.

Cussegl:

Alinea 2; definir auter ils criteris resp. precisar cun "purs cun terren cunfinont" ni "purs sesents en vischnaunca".

Alinea 3; purs ch'ei buca sesents en vischnaunca ein obligai da vischinar leu nua ch'els han il baghetg d'economia principal. Tenor il cussegl sa alinea 3 vegnir strihada.

Alinea 4; la suprastonza sa far excepziuns per diever da pastira p.ex. per fatgs turistics e bargias da lenna. Dallas bargias da lenna vegn gia fatg menziun el regulativ da taxas, allura sto era in'aleina vegnir definida per talas.

Cussegliaer Christoph Berger dat giu ina proposta per midar art. 3 alinea 4 .

President dalla cumissiun Wendelin Jacomet:

Art. 4 diever; quei artechel vegn scursanius e definius en detagl els contracts.

Cussegl:

Igl artechel 8 san ins integrar egl artechel 4 ed aschia schar naven quel.

Da principi ei da ponderar da dar la cumpetenzza dallas taxas al cussegl tenor la constituziun.

Art. 4 cumpletar il tetel; diever ed incasso dalla pastira.

President dalla cumissiun Wendelin Jacomet:

Art. 6 niev; scamond da pasculaziun sin territori buca affittau.

Cussegl:

Art. 6 alinea 2; ei quei capeivel ed applicabel? Ei dat situaziuns ch'in uaul sa e sto vegnir pasculaus. Giavisch da visar sigl artechel ord la lescha cantunala.

Gerau Clemens Berther:

Caussas che pertuccan igl uaul van sut la lescha cantunala. Talas situaziuns ein da definir el liug cul pur. Medem agir vala en connex cun tschaffadas dad aua.

Cussegl:

Egl art. 7 va ei per definir situaziuns ch'ins sa buca clauder. En Barcuns van cauras libramein sin pastira medemamein sil Péz Palas. Igl artechel ha consequenzas ch'ins sa buca applicar. Giavisch da risguardar las situaziuns extraordinarias sco p.ex. cunfins natural da greppa, vals, cavorgias eav.

President dalla cumissiun Wendelin Jacomet:

Art. 8 ei integraus egl art. 4 e sa aschia vegnir strihaus.

Cussegl:

La taxa sa buca vegnir definida tenor ara ni tenor stoss. Igl ei da mirar da tgei pastira che mintga pur fa diever el contract. Il tscheins ei da definir sco tochen da cheu. Las datas dad aras ein gie buca avon maun.

Stoss ed aras ein duas variantas pusseivlas. In'ulteriura pusseivladad fuss tenor pagaments directs. Lura fuss ei da cumpletar la lescha cun; l'obligaziun dil pur d'annunziar sias datas.

Gerau Clemens Berther:

Las surfatschas dallas pastiras vegnan tschaffadas. Ils contracts valan 6 onns. Finamira ei da far gest ed aschi sempel sco pusseivel.

President dalla cumissiun Wendelin Jacomet:

Art. 9 definescha ils fatgs dall'Alp Magriel sco suletta alp dalla vischnaunca.

Cussegl:

"Sömmerungsbetriebe" menaschis d'alpegiaziun (alps) dat ei plirs. Igl art. 9 fa buca senn e duei vegnir strihaus.

President dalla cumissiun Wendelin Jacomet:

Art. 10 fa attents sin lescha davart dils dis da ruaus publics.

Cussegl:

Ei fa buca senn da visar sin autras leschas pertuccadas sco cheu la lescha 840 davart ils dis da ruaus publics. Art. 10 duei vegnir strihaus.

President dalla cumissiun Wendelin Jacomet:

Art. 11; principis generals. Cheu ha la cumissiun strihau alinea d) che pertucca il daner da siet che vegn oz buca praticaus pli en vischnaunca.

Cussegl:

Art. 11; principis generals punct d) duei buca vegnir strihaus, mobein duei restar francaus sco ella lescha actuala. Ulteriur giavisch ei da menziunar e definir las finamiras el contract d'affittaziun.

President dalla cumissiun Wendelin Jacomet:

Art. 14 fa pretensiuns arisguard tschuffernar vias. Quellas sto il caschunader schubergiar.

Cussegl:

Vias tschuffernadas ston vegnir schubergiadadas immediat dil caschunader. Vias che vegnan buca schubergiadadas entras il caschunader vegnan schubergiadadas da tiarzas persunas. Il quen va denton al caschunader.

Avon che dar su la lavur a tiarzas persunas sto il caschunader vegnir informaus. En in discuors da beinvuglientscha sa la situaziun vegnir slijiada.

President dalla cumissiun Wendelin Jacomet:

Art. 15; denter auter vegn avisau all'ordinaziun federala concernent ils pagaments directs. Determinescha il better grascha e puschina sin pastira. Quei vegn reglau dil cantun cun contracts. Ellas alps astga buca vegnir tratg neu grascha d'ordlunder.

Cussegl:

Art.17 ei da precisar; en cass buca pusseivel dad ir sur agen terren.

Igl art. 20 ei senza la lescha veglia buca capeivels. Tgauns da catscha ein era pertuccai. Ins duei schar igl artechel dalla lescha veglia.

President dalla cumissiun Wendelin Jacomet:

Art. 20 ei stipulaus sco ella lescha da Tujetsch.

Cussegl:

Art. 22; Gaglinas, duei vegnir strihau.

President dalla cumissiun Wendelin Jacomet:

Art. 23 regla da niev ils fatgs dils apiculturs.

Gerard Clemens Berther:

Igl artechel definescha la distanza da 500 m denter ils ualers. Quei ei necessari da stipular cunzun per ils apiculturs viandonts dalla Bassa.

Cussegl:

Art. 23; midada dil plaid ualers cun stabiliments d'apicoltura.

President dalla cumissiun Wendelin Jacomet:

Art. 25; Ventilaziuns e scaldaments. Vegn reglau tenor las prescripziuns dalla lescha d'energia resp. davart la protecziun digl ambient. Canera entras las ventilaziuns da fein sedrezza tenor la legislaziun federala davart la protecziun encunter canera.

President dalla cumissiun Wendelin Jacomet:

Art. 26 nova formulaziun alinea 2. L'aleina 3, 4 e 5 ei niev. Alinea 3; niev il demontar seivs (spazi da temps da treis dis). Alinea 4; specialmein visau vi sin il scamond da far diever d'isolatur vid las plontas. Alinea 5 pertucca las sendas da viandar. Sch'ei vegn traversau ina senda eis ei d'ereger ina purteglia.

Cussegl:

Alinea 3; quei regla la lescha da catscha. Alinea 4; isolatur en plontas fan buca donn e restrenschan pusseivladads. Alinea 5 formular pli exact; sendas marcadadas e viandonts che vegnan periclitai.

President dalla cumissiun Wendelin Jacomet:

Art. 27; noda casa.

Cussegl:

Entgins dil cussegl ein digl avis che quei art. 27 sa vegnir strihaus, cunquei ch'ils biars gnanc drovan pli la noda casa.

President dalla cumissiun Wendelin Jacomet:

Art. 28 niev; stgellas ei in usit e s'auda tier nossa cultura. La lescha lubescha da purtar stgellas.

Cussegl:

Giavischa da cumpletar alla fin digl art. 28; cun prender il duiv risguard.

President dalla cumissiun Wendelin Jacomet:

Art. 29; la summa dils castitgs ei alzada sin frs. 500.-- entochen frs.1'000.--. Quei ei sclariu giuridicamein.

Cussegl:

Castitgs ston esser fixai naven da frs. 200.--. Aschia ein castitgs era stipulai ella lescha da planisaziun da terren dil cantun. Proposta frs. 200.-- entochen frs. 5'000.-- Tier surpassaments sa la suprastanza pretender ch'il caschunader remetti il fatg el stan primar.

President dalla cumissiun Wendelin Jacomet:

Art. 30; midau la durada da recuorer da 20 sin 30 dis.

Art. 31; la lescha va en vigur igl 1. da schaner 2019.

Cussegl:

Remarcas en general: La lescha duess promover l'agricultura senza memia biars scamonds. Per exempel en loghens che negin pasculescha duess ei dar impuls cun indemniziuns.

Las zonas da nuorsas ein buca menziunadas ella lescha. Quellas stattan sut il menaschi dils vischinadis.

Las cunvegnientschas vegnan visadas ed ei vegn fatg da niev contracts ch'ei tenor lescha da migiuria d'agricultura.

Ils contracts novs ein valeivels sis entochen nov onns cun in temps da visada dad in onn avon ch'il contract spira. Il temps dalla visada dallas cunvegnas existentas duei vegnir sclarius exactamein. La fuorma dils contracts d'affittaziun ein da schar consultar il Plantahof.

Ei la lescha presentada stada en consultaziun tier l'Uniun purila?

Gerau Clemens Berther:

Ina lescha cun paucs artechels lai la pusseivladad alla suprastonza da decider sur da fatgs. Ils contracts ein stipulai tenor las normas valentas dad oz ed ein semeglionts allas cunvegnas. Il sboz dalla lescha presentada ei buca staus en consultaziun. Il cussegl ha da decider surlunder.

Decisiun:

Cussegl:

Tenor decisiun va la lescha anavos alla cumissiun. La suprastonza presenta quella cun las amplificaziuns e midadas en in proxim cussegl.

Cussegl da vischnaunca Disentis/Mustér
Il president: Igl actuar:

Armin Manetsch

Paul Duff



3. Center da sport e cultura: Sanaziun cumplessiva – Credit supplementar da planisaziun (messadi nr. 24-2017/2020)

Presentaziun:

Suprastonza:

Gerau Clemens Berther:

El project da submissiun mavan nus dad ina summa da 6 milliuns francs anora, tenor studis e schazetgs. Tenor il niev project da sanaziun ed engrondaziun dil CSC ein 11,2 milliuns francs cun dretg da honorar. Quel ei daus entras las normas SIA cun architects.

Discussiun:

Cussegl:

Il project da «ERLEBNISPLAN» presentaus dalla suprastonza cun ina calculaziun d'investiziuns da 6 milliuns francs ha perschadiu. Il credit da planisaziun era sin frs. 375'000.--. In credit da 15 milliuns francs, il qual ha grondas consequenzas sin auters projects en vischnaunca, saiel jeu buca sustener. Cun in gie tier la summa da planisaziun da frs. 119'000.— acceptein nus igl entir project e savein buca far reducziuns ni strihar ina caussa ni l'autra per spargnar cuosts e cheutras sminuir il deficit annual da frs. 500'000.—. La summa dalla sanaziun cumplessiva per il CSC ei memia aulta ed ha buca schanza da passar la decisiun dil pievel. Sche la conjunctura va buca sco previu savein nus buca reducir il project senza ir alla votaziun dil pievel.

Tgei consequenzas ha la decisiun giu da returnar il project dalla sanaziun tenor il davos cussegl?

Dattan las midadas dil project tenor la decisiun dil davos cussegl cuosts supplementars?

Gerau Clemens Berther:

Els cuosts totals per la sanaziun ed engrondaziun ei la summa da frs. 119'000.— integrada. La decisiun dil davos cussegl mida buca quella summa ch'era gia lura integrada els cuosts totals.

Cussegl:

Igl ei da dir gie per quei credit da frs. 119'000.—. Las scolas fan il pli grond diever dil CSC. Plinavon vein nus el cussegl la pusseivladad da far midadas. Il cussegl ei vegnius informaus che la vischnaunca da Mustér sa far deivets tochen la summa da 20 – 25 milliuns francs.

Stat la summa dalla sanaziun totala sin quels 15,1 milliuns francs?

Tochen tgei fasa da lavur dalla sanaziun ei il contract cugl architect stipulaus? Co vegn girau che quei architect fa las lavurs suandontas?

Gerau Clemens Berther:

Il contract suttascret dils architects ei valeivels per l'entira sanaziun. Nus astgein ughegiar l'investiziun da 12 milliuns francs sco tuts han fatg avon nus. Il svilup ei positivs, famiglias giuvnas restan en vischnaunca. La summa totala gia presentada resta sin quels 15,1 milliuns francs. Opziuns ch'ins ha vegnan declaradas e decididas.

Cussegl:

Las lavurs per mantener la substanza e l'infrastructura el CSC ein calculadas cun 11 milliuns francs e ston vegnir fatgas. Quei pretenda dil cussegl la tenuta da vuler

mantener la valeta per ils avdents dalla vischnaunca. La suprastanza sa agir en caussa finanzas.

Ella fasa actuala da tscheins bass sa la vischnaunca prender si credits cun tscheins favoreivels a liunga vesta.

Il deficit dil menaschi dil CSC ei frs. 500'000.— per onn. Il studi dalla HTW va d'in deficit dad 1 milliun francs ad onn anora. Suenter la sanaziun vegn quei deficit denton pli pigns.

President communal Robert Cajacob:

La refinanziaziun cun credits sto succeder a moda rullonta tenor basegns. Nus stuein setener vid las determinaziuns dallas bancas. Ils tscheins ein suttamess a midadas.

Decisiun:

- 1. Il cussegl decida cun 13 gies ed 1 na da conceder il credit complementar da frs. 119'000.— per preparar la planisaziun dalla sanaziun cumplexiva dil Center da sport e cultura sin fundament dalla nova summa da baghegiar da ca. 15 milliuns francs.***
- 2. Il cussegl decida cun 13 gies ed 1 na da suttametter quei conclus al referendum facultativ tenor art. 21, lit. e dalla constituziun communal.***

Cussegl da vischnaunca Disentis/Mustér
Il president: Igl actuar:

Armin Manetsch

Paul Duff



4. Ura da damondas (conform ad art. 44 dil regulativ da fatschentas)

Suprastonza:

President communal Robert Cajacob dat risposta sin damonda da cusseglier Adrian Deflorin:

La vischnaunca da Mustér sto exzonar terren da baghegiar en connex cul niev artechel «kantonal Richtplan». Cons m² quei vegn ad esser san ins oz buca dir. En collaboraziun cun la planisadra stuein nus mirar nua ch'ei fuss pusseivel d'exzonar. Ina cumissiun sto sedar giu cun quei problem complex.

La suprastonza ha eligiu ina cumissiun per scaffir ina lescha da polizia ch'ei dat aunc buca en nossa constituziun. El medem mument vegn elaborau in regulativ da multas disciplinaras. Dalla cumissiun fan part: Caminada Fredi, Cathomen Simon, Flepp Renzo, Fry Etter Jenny, Jacomet Wendelin, Maissen Ervin, Manetsch Armin, Manetsch-Sialm Pius, Murer-Fatzer Ursina e president communal Robert Cajacob.

Gerau Clemens Berther:

La suprastonza ha eligiu Pirmin Lombris sco capoluvrer tiel menaschi tecnic.

La suprastonza ha eligiu ina cumissiun per preparar la lescha per il manteniment dallas vias e drenadis dalla meglieraziun dalla vischnaunca Mustér. A quella fan part: Berther Armin, Bisquolm Valentin, Lutz Martin, Lutz Renaldo, Maissen Ervin, Manetsch Placi, Murer-Fatzer Ursina e gerau Berther Clemens.

Il settember 2018 entscheivan las lavurs dalla meglieraziun en vischnaunca. Sco empremas vias vegnan baghegiadas la via Punt da Brulf – Quadras, Salaplauna – Rieven e Rieven – S. Gada.

Cussegl:

Ei ha dau midadas el sectur dil turissem a Mustér. Tgei succeda da niev cun la carta da hosps? Pagan las pendicularas en lur stabiliments da hosps era la taxa da turissem?

President communal Robert Cajacob:

Ei dat neginas excepziuns per ils hosps el hotel Catrina, quels pagan la taxa turistica sco ils hosps d'auters hotels. La carta da hosps da SMT ei a nus buca clara tgei ch'ella cuntegn. Quella cuntegn cunvegna denter las vischnauncas Mustér e Tujetsch. Per sustener events ei la vischnaunca responsabla actualmein e quei sto vegnir midau, aschia che la vischnaunca vegn deliberada e l'incarica va a SMT. Propostas ein avon maun. Persuenter pagan las vischnauncas dapli a SMT. Excepziuns dalla regla sa ei dar. Da niev ei il viadi cun la MGB gratuits igl entir onn. Per ils cuosts dalla carta da skis cumbinada e per il diever dil CSC sto SMT contrahar cun las pendicularas e cul CSC.

Cussegl da vischnaunca Disentis/Mustér
Il president: Igl actuar:

Armin Manetsch

Paul Duff